



# Synfocity = 494

mail us at : [mzsynfo@gmail.com](mailto:mzsynfo@gmail.com); [mizoramsynod@gmail.com](mailto:mizoramsynod@gmail.com) - Phone - 2314648

3<sup>rd</sup> July, 2014

## □ Health Sunday & Hospital Sunday

July 6, 2014 (Pathianni) hi Health Sunday & Hospital Sunday (Damdawi In Pathianni) a ni a. Mizoram Presbyterian Kohhran chuan Hospital Sunday hi kum 1928 atang khan a hmang tan a, kum 1981 atang khan *July Pathianni hmasa ber* hi ni bik atan hman a ni ta a ni.

Kum 1985 Synod Inkhawmpui thu angin 1988 atang khan January Pathianni hnuhnung berah Phâr Pathianni (Leprosy Sunday) hman thin a ni a (Gen. 27). Kum 2004 Synod chuan phâr pual chauh ni lovin natna dangte pawh huamin 'Health Sunday' tiin a thlâk ta a (Gen. 3). Kum 2006 atang khân Health Sunday hi hman tan a ni. Bial KTP Inkhawmpui nen a inruâl chang a awm avângin February Pathianni wavi thumnaah hman thin a ni ta a. Kum 2006 khan *Malaria chungchang* zirho a ni a, kum 2007-ah *Cancer chungchang* zir ho a ni leh a, kum 2008-ah *HIV/AIDS chanchin* zir leh in kum 2009-ah *Zuk leh Hmuam* zir ho a ni. Kum 2010 khan *Mimal hriselna* tih zir ho a ni leh a, 2011 khan *Hrisel nan ei leh in* tih zir ho a ni a, 2012 khan *Mit enkawl dan* tih zir ho a leh a ni a, nikum (2013) khan Hriselna leh Thianghlimna tih zir ho leh in kumin (2014) hian Rilru Hriselna (Mental Health) tih zir ho a ni dawn a ni.

Kum 2008 Synod-in Health Sunday leh Hospital Sunday hi Pathianni wavi khatah a ruala hman ni se, tia a rel (Gen. 67) angin kum 2010 atang khan Health Sunday leh Hospital Sunday hi a rualin ni khatah hman tan a ni ta a ni.

Kumin 2013 hian Health Sunday pualin chawhnu hun hman a ni ang a, thilpek lak khawm a ni bawk ang. Thilpek chu Tualchhung Kohhranin damlo tanpui nan tha an tih angin an hmang ang. Zan hun chu Hospital Sunday puala hman a ni thung ang a, thilpek lak khawm a ni bawk ang. Thilpek chu Synod Hospital pual a ni ang a, Bial Treasurer kaltlangin Synod Office-ah theh luh tur a ni.

Kumin Health Sunday & Hospital Sunday atan hetiang hian programme duan a ni:

### Chawhnu Inkhâwm

#### HEALTH SUNDAY PUAL

Thupui : Rilru hriselna (Mental Health)

Chhiar tûr : Mt 5:3-12; Thuf 4:23-24

### Zan Inkhâwm

#### HOSPITAL SUNDAY PUAL

Thupui : Tidamtu Lal Isua

Chhiar tûr : Ex 15:26; Sam 103:3; 107:20; Mt 10:8; Lk 4:40-41; Rom 15:18-19

*Hospital Sunday 2014 Report phek hnungah tarlan a ni.*

## □ Zin

♦ July 3 & 4, 2014 hian Assam Border tlawh turin Synod Puipate, Rev. Lalzuithanga, Senior Executive Secretary; Upa H. Zoliana, Synod Secretary; Rev. B. Sangthanga, Synod Secretary (Jr.); Upa Vanengliana, Synod Statistician leh Rev. Dr. R. Lalbiakmawia, Finance Officer te an kal a, Tv. Peter Lalanpuia, Synfo Cameraman-in a tawiawm bawk.

♦ July 2 - 5, 2014 chhung hian Christian Medical College (CMC) Vellore-ah Ordinary Meeting-a tel turin Rev. Lalramliana Pachuau, Executive Secretary i/c Hospital leh Dr. Vanlalruata, Hospital, Director te an kal.

## □ Zu zawrh chungchanga tawngtairual thu

Mizoram Sawrkarin Zu khap burna dan tidanglama Zu zawrh phalna Dan siam a tum tih hriat a nih avangin July 1, 2014 (Thawhlejni)-a Synod Executive Committee (SEC) Emergency Meeting chuan Zu zawrh khap chungchanga Kohhranhote July 6, 2014 (Pathianni) Zan inkhawmah tawngtairualna neih nise tiin a rel a. Hemi chungchanga thuchah leh tawngtairualna thupui tur phek hnungah tarlan a ni.

## □ Synod Hospital

♦ **Health & Hospital Sunday** : July 6, 2014 hi Health & Hospital Sunday a ni a, Kohhran hrang hrang 11-ah thusawi tura sawmna angin a hnuai tarlan ang hian Synod Hospital hotute an kal chhuak ang :

### Sn. Kohhran

1. Bungkawn
2. Khatla
3. Dawrpui
4. Durtlang

### Thusawitu

- Dr. Vanlalruata  
Upa F. Lalsangliana  
Dr. Lalchhanhima Ralte  
1) Dr. Vanlalruata  
2) Dr. Rualthankuma

### Thusawi hun

- Zan inkhawm  
Zan inkhawm  
Zan inkhawm  
Chhun inkhawm  
Zan inkhawm  
Zan inkhawm  
Zan inkhawm  
Zan inkhawm  
Zan inkhawm  
Zan inkhawm  
Zan inkhawm  
Chhun leh Zan

5. Vaivakawn Vengthlang

6. Zarkawt

7. Leitan

8. Kanan

9. ATC

10. New Capital Complex

11. Ramthar Veng

Hospital Sunday pual hian Kohhran tinah Hospital Report leh Thuchah thawn chhuah a ni.

♦ **Training** : CBM leh Synod Hospital thawhchonain hma a sawn zel a. Hospital tihchangtlunna tur mai bakah thingtlanga mite chhawr theih turin ruahmanna pawh kal pui mek zel a ni. Thawhchon hian Mit (Eye) enkawlina lamah thawktute Training pek a keng tel nghal a. Tunah hian Pu R. Lalnehkima, Ophthalmic Technician chu July, 2014 chhung 'Glaucoma Detection' training turin Dr. Schroff Charity Eye Hospital, New Delhi-ah a thang mek a ni.

## □ MSSU

♦ July 5, 2014 (Inrinni) hian Airfield Vengthar Bial huapin Airfield Vengthar Kohhranah Sunday School Zirtutu Training neih a ni dawn a, hemi neihpui tur hian T.Upa Lalthahluna Ralte, MSSU Asst. Coordinator leh Upa K. Vanlalngaha, Ramhlun East (MSSU Trainer) te an kal ang. Zan Pathian biak inkhawmah Upa K. Vanlalngahan fanau enkawl chungchang thuchah a sawi ang.

♦ July 5, 2014 (Inrinni) hian ITI Veng Bial huapin Mualpui Bethel Kohhranah Sunday School Zirtutu Training neih a ni dawn a, hemi neihpui tur hian Upa K. Zoremsanga, Kulikawn leh Upa Hrilthansanga, Mission Vengthlang (MSSU Trainers) te an kal ang. Zan Pathian biak inkhawmah Upa Hrilthansangan fanau enkawl chungchang thuchah a sawi ang.

- ❑ **P.C. Girls' School Headmistress thar**  
P.C. Girls' School-a Headmistress ni lai Pi Lalropui chu July 1, 2014-ah Superannuation pension-a a kal tak avangin SEC 251 in a rel angin Ni. Zaithanchhungi, Teacher, P.C. Girls' School chuan July 1, 2014 atang khan Headmistress hna a chelh thar.
- ❑ **Kristian Thalai Pawl**  
July 5, 2014 (Inrinni) hian Lungsum Branch KTP Diamond Jubilee lawmnaah Pu Zonunsanga Ralte leh Pu K. Lalruatpuia, CKTP Committee Member te an kal ang.
- ❑ **Music**  
July 3 & 4, 2014 zan hian Electric Veng Kohhranah Zai hruai Training neih a ni dawn a, hemi neihpui tur hian Lalromawia, Senior Music Instructor a kal ang.
- ❑ **Campus Ministry**  
July 4 & 5, 2014 zan hian Chhinga Vengthlang Kohhran Biak Inah Tleirawl - Rawlthar Pual Camping neih a ni dawn a, camping neihpui tur hian Rev. Lalchungnunga, Director leh Tv. C. Lalremruata, Outreach Worker te an kal ang.
- ❑ **Hruaina Eng FM Radio & TV Programme**
  - ◆ **JULY 4 (FM Zoawi Aizawl @ 7:30 p.m.) :**  
**Solo :** Andrew - Ka nun chhungril lawmna, **Choir :** Venghlui Pastor Bial Zaipawl - Lalpa Lo Kal A Hnai Ta, **Thuchah :** Rev. Lalramliana - Ka chhuan ber Krista kraws, **Solo :** Maggie - Min siamthar leh rawh, **Choir :** Mizoram Synod Choir - Aw Isu, min kai ang che, **Choir :** Muanna Veng kohhran Zaipawl - A lo kal leh ngei dawn
  - ◆ **JULY 4 (FM Lunglei @ 7:30 p.m.) :**  
**Solo :** Andrew - Ka nun chhungril lawmna, **Synod News, Choir :** Venghlui Pastor Bial Zaipawl - Lalpa Lo Kal A Hnai Ta, **Thuchah :** Rev. Lalramliana - Ka chhuan ber Krista kraws, **Solo :** Maggie - Min siamthar leh rawh, **Choir :** Mizoram Synod Choir - Aw Isu, min kai ang che, **Choir :** Muanna Veng kohhran Zaipawl - A lo kal leh ngei dawn
  - ◆ **JULY 6 (TV Programme @ 3:00 p.m.) :**  
**Zaipawl :** ITI Veng Pastor Bial Zaipawl - Famkimna Kraws, **Interview :** Hruaitu hluite, **Solo :** Lalruathlui - Joshua leh Kaleba
- ❑ **Susamachar Prasaran Programme**  
**JULY 6 (Pathianni) 5:00 pm. Hindi Gospel Programme (Susamachar Prasaran) :**  
**Group/Choir/Solo :** Durtlang Masihi Sangati - Santosh, **Group/Choir/Solo :** Lunglei Area Masihi Sangati - Yisu lio tera nam, **Sermon :** Rev PC Rohlira - Isu masi pita ke pas me pongni ke lye rajta, **Group/Choir/Solo :** Chanmari Masihi Sangati - Jisu Tomai, **Group/Choir/Solo :** Chawlhmun Masihi Sangati - Tu Pyar

### KOHHRANHOTE HNENA THUCHAH

Keini, Mizoram Presbyterian Kohhran hian Zu chungchangah thuchhuhah kan lo siam tawh thin a. Tunlai hian kan Sawrkar chuan Zu khap burna dan ti danglama zu zawrh phalna dan siam turin July 8-10, 2014 Budget Session-ah hian pharh a tum tih hriat a ni a, chuvangin khawpui chhunga Synod Executive Committee member-te Emergency Meeting ni 1 July, 2014-a neih chuan Zu zawrh khap chungchangah Kohhranhote tawngtai tura ngenna leh thuchah kan rawn chhuah leh ta a ni.

**1. Zu chungchanga Kohhran dinna :**

Mizoram Presbyterian Kohhran hian a din tirh te atangin Kohhran mite chu Zu-a inhnamhnawih a khap a, kum 1910 April thlaa kan Kohhranin Presbytery hmasa ber a neih atang khan a lo khap tawh a ni. Chu chu kum za zet kan kal tawh hnuah pawh hian kan dinna a la ni ta reng a ni.

**2. Zu khap burna dan :**

Kan rama Zu khap burna dan kan hman hnu hian kan khawlai te pawh a lo ralmuang ta hle mai a, Zu ruih avanga lirtheia chetsualna leh zu ruih avanga tharum thawhna thleng thin pawhin a tlâkhnam phah tawh hlein a hriat a. Tunah chuan mipui nun a zalen a, chhiatna leh thihna thleng thei tam tak a vêng a, mimal, chungkua, khawtlang leh kan ram tan Zu Khap Burna Dan hman zel hi Pathian Thu atanga ngaihtuah leh kan ram mipui nun en pawhin tha kan ti a ni.

**3. Zu zawrh phalna dan :**

Mi thenkhat chuan hnam changkang zawkte kal dan ena insiamrem ve thain an hria a, sawrkar sum lakluh tihpunna atana phalna pea zawrhtir mai duhte pawh kan awm ta niin a lang a. Kohhran erawh chuan kan Pathian Thu-in min kaihhruai dan ena kal mai hi tha kan ti a. Zu-in kan hriselna a khawih pawh dan te, khawtlang nunhona a nghawng buai theih dan te ngaihtuahin kan ram leh khawtlanga Zu tihlangnel loh hi kan thatpui ber tur niin a lang.

**4. Tawngtaiin tan i la ang u :**

A tawp berah chuan sualin kan ram a ei chhiat zel loh nan a venna tha ber chu Chanchin Tha thiltihtheihna hman hi a ni tih hre reng ila. Kawng hrang hranga tan kan lak bakah Tawngtai mawlh hi i uar ang u. Kohhran inkhawmah te, chhûng inkhawmah te leh mimala kan tawngtainaah te Pathian hnenah i thlen zel ang u.

**5. Tawngtai hun tur : July ni 6, 2014 Pathianni zan inkhawmah**

**6. Tawngtai thupui :**

- a) Kan ramah Zu zawrh phalna Dan hman a nih loh nan
- b) Kan ram Roreltuten Pathian duh dana ram ro an rel theih nan.

Sd/-  
UPA H. ZOLIANA  
Secretary

Sd/-  
REV. K. LALHMUCHHUAKA  
Moderator

MIZORAM PRESBYTERIAN KOHHRAN : SYNOD

## KUM 2014 HOSPITAL SUNDAY REPORT

Synod Hospital-a thawktuten Hospital Sunday hmanthu Kohhran mipui zawng zawngte chibai kan buk a che u. Kum 2014 kan lo chuangkai a, kan rawngbawlna pawh tluang takin a kal zel a, a lawmawm tak meuh a ni. Kohhrante leh Pathian hnenah lawmthu kan sawi e.

Damdawi In chanchin sawi tur tam tak a awm a, sawi kim sen a nih loh avangin hriat belh duh leh ngaihven zui duhte chuan zawh belh theih reng a ni e. Hma lakna hrang hrangte hetiang hian tarlang ila.

**1. Damdawi in khum awm zat : 320**

<b>2. A. Thawktu awm zat</b>	<b>A nghet</b>	<b>A nghet lo</b>	<b>An vaiin</b>
a) Doctor	26	1	27
b) Nursing Staff	120	66	186
c) Para Medical Staff	22	6	28
d) General Staff	92	38	130
<b>Thawktu zawng zawng</b>	<b>260</b>	<b>111</b>	<b>371</b>

**3. PRIVATE WARD (PI PUII IN) LEH NURSE ZIRLAI HOSTEL SAK HNA KAL MEK :**

Nikum Report-ah khan Pi Puii In hi kum 2013 chhunga sak zawh tura hma lak mek niin tarlan a ni a. Nimahsela, a ruala chhawng hnih sak zawh tum a nih leh tak zawk avangin kan zo hman ta lo deuhva, tunah hian luah theiha peih fel tep a ni. Dr. Gwyneth Parul Roberts (Pi Puii) hming chawin a hmingah 'Pi Puii In' tih a ni. A chhawng chung ber leh a hnuai kawng an hi damlo a mala awm theihna tur (Private Ward) a ni a, Room 32 a awm thei ang. He mi chhawng hnuai hian Mit (Eye Unit) Inentirna hmun (OPD), damlo awmna (Ward) leh inzaina (Operation The-atre)-te an awm ang a, a hnuai berah Damdawi Ina damlo awm leh inentirte dinhmun chhinchhiahna (Medical Record Unit) a awm ang.

A mala awm theihna hi kan neih tlem avangin a awm duh ten kan inchan lo hle thin a, sak zawh hlan a nghahhlehawm hle. Luah theih hunah chuan hemi harsatna hi a ziaawm ve deuh tawh ang chu. Damlo tana awmna nuam tak ni thei turin changkang taka thuan tum a ni. Tin, Nurse zirlai zawng zawng awm theihna tur sak hna pawh a kal mup mup reng a. Nakkum lamah chuan zawh hman beisei a ni.

**4. DAMDAWI IN AWMMAN BA CHUNGCHANGA HMALAKNA :**

Kan Hospital hi amaha intodelh tura ngaih ni mahse a mamawh apiangte enkawlna tura tihdam rawngbawlna hmun a nih avangin min rawn pantu apiang enkawl thin a ni a. Damlo tam zawk awmman pe tla nghal thei an awm laiin a baa chhuak leh pe thei lo tak tak, enkawlna man ngaihdam ngai an awm reng baw. Chutiang awmman ba tlingkhawm chu titem tura hma lak reng a ni chungin min bat saktu tam berte hi khawsak harsa, ni tin ei chawp zawng leh awm hmun ngelngnet pawh nei thei lo leh pek tur nei thei ngang lote an ni fo. Umzui pawha awmze nei chuang lo leh umzui hleih theih loh engemaw zat an awm thin.

Heng ba tlingkhawm hian damdawi in enkawlna kawngah harsatna a thlen theih avangin min bat sakte dinhmun hriat chian nan an awmna Kohhranah min umzui sak tura ngenna 5th February, 2014 atang khan mi 1060 zet hnenah ba thinna thawn chhuah a ni a. Kohhran leh mimal chhanna kan dawn atangin uluk taka ngaihtuah a nih hnuah bawhzui tur leh Hospital Sunday thawhlawm leh mi thahnemngaithe thilpek (Charity Fund) atanga pek sak turte thliar fel a ni. Kohhran thenkhat chuan heng mi harsate hi an rawn pek sak a, an chin hriat lohte thlenga rawn pek sak Kohhran an awm nual baw.

Kan ngenna anga Kohhran ten nasa taka hma min lo lak puinaah lawmawm kan ti hle. Chutih laiin ba thinnaah tihsual palh a awm tih hriat a ni. Pawisa pekna hmun leh awmman bate chhinchhiahna (Register) kawlna hi hmun khatah a nih loh avangin pawisa pek hnuah babu lama tihfel nachang hriat loh vanga hetiang thin nawn hi an awm thei a, pawisa kan tiin lo hrethiam hram turin kan ngen a ni. Engpawhnise, mi thahnemngai te thilpek tlingkhawm atangin awmman pe tla thei lo mi tam tak tlan chhuah an ni a, a lawmawm tak zet a, thilpek petute hnenah lawmthu kan sawi e.

**5. HIV/AIDS VEI ENKAWLNA HMUN (GRACE HOME) :**

MSACS-te nena kan thawhhona Grace Home enkawlna atana tanpuina kan hmuh thin chu April, 2013 atang khan tihtawp a nih tak avangin HIV/AIDS natna veite enkawl hna hi Kohhranho kutah a lo inngat ta a ni. Grace Home hi damlo khum 30 awm theihna a ni a, inenkawlna tur sum nei lo tak tak enkawlna hmun a nih mai bakah an awm zel dan tur leh chhungkaw dinhmun thlenga reifelh thlengin rawngbawl hna thawhna hmun a ni a, Kohhran te tawngtaipuinah leh tawiamna kan mamawh takzet a ni. April, 2013 atanga March, 2014 inkar chhungin damlo mi 568 admit an ni a, mitthi 41 an awm a ni.

**6. UNIT HRANG HRANGA DAMLO ENKAWLNA KHAWL MAMAWH NEIH BELH ZEL A NI :**

Hospital-ah hian khawl leh hmanraw lian tham lei tur ngaihtuatu bik Purchase Sub-committee a awm a, sum awm dante thliar chungin damdawi in mamawh lei turte an thliar thin. Mimal, Pawl leh Kohhran atangtein chutiang leina tur sum rawn pe leh a hmanrua leh khawl min rawn petu an awm thin baw a, a lawmawm hle. Damdawi in changkan zelna atana mi inphalte Pathianin min pe zel thin hi lawmthu i sawi ang u.

Kum 2011-a HIV/AIDS veite enkawlna atana thisen exam-na khawl CD4 Cell Counting Machine, Presbyterian Church of Wales atanga kan dawn pawh rei tak chung NACO atanga hman phalna kan hmuh loh chu hmuh a ni tawh a, tangkai taka hman theih a ni ta a ni.

**7. THISEN THLIARHRANNA KHAWL (BLOOD COMPONENT SEPARATOR) :**

Kum 2011 Synod Inkhawmpuiin a rel angin Thisen Thliarhranna Khawl chu a dahna hmun sak zawh a nih hnuah a khawl siamtu lamin an rawn bun fel ta. A mamawhte tan tangkai taka hman mek a ni. A dahna tur In leh a khawl man atan hian Rs 1,37,00,000/- sen a ni. Damdawi in tan hetiang khawl tangkai kan nei ta hi hmasawna nasa tak a niin damlo enkawlna atan thil pawimawh leh tangkai tak a ni.

**8. WELSH RAM KOHHRAN ATANGIN DAMDAWI IN PUI TURIN NULA PAHNIH AN LOKAL :**

Kan Damdawi Ina a tul tul thawkin nula pahnih Miss Catrin Angharad leh Miss Gwawr Davies te chu 27th June, 2013 - 27th July, 2013 chhung an lokal a. Miss Catrin Angharad hi University zirlai, Social Works lama inhmanga HIV/AIDS natna veite enkawl thin a nih angin Grace Home-ah a thawk ber a, Miss Gwawr Davies hi Nurse zir tura inbuatsaih mek a ni a, Naupang Ward-ah thawhtir a ni. An awm chhungin nuam an tiin Kohhran hrang hrang an tlawh kual nual a ni. An haw hnu thlengin Grace Home tanpuina tur sum Kohhran-ah zawng kualin Rs. 50,000/- lai an rawn thawn leh a ni.

**9. EI TUR THACHAWH THIAM (DIETARY UNIT) NEI TURA HMALAKNA :**

Kan Damdawi Inah hian damlo te dinhmun a zira ei tur tha chawh thiam (Dietician) kan nei tawh thin a, damlote leh mimal mamawhna lo sang zelah neih leh tula Hospital Board chuan a hriat avangin Remlalfaki, M.Sc. (Clinical Nutrition & Dietetics), D/o Vanlalhlana, Mamit chu he hna pawimawh tak thawk tur hian lak a ni a, 2nd September, 2013 atang khan a hna hi a rawn zawm a ni. Dietary Unit changlung tak nei tura hma lak chhoh mek zel a ni. Dietician hi damdawi inah a mamawh te vil tur leh office hun chhunga rawn theihin a awm reng a ni. Dam lo chak lo te, zai tawh te leh zunthlum vei te ei leh in lama thurawn petu tha tak a ni.

**10. NATNA HRIK ENNA HMUN (MICROBIOLOGY UNIT) :**

Damlo enkawlna kawngaw pawimawh tak natna hrik enna hmun Microbiology Unit chu Synod tirha Christian Medical College, Vellore atanga zir chhuak Miss Christine V. Sailo, M.Sc. (Micro-biology) leh hemi bik atana training chhuak mithiam rual ten an enkawl mek a. Natna enkawlna atan leh zawn chhuahna kawngaw tul leh tangkai takin ni tin an thawk mek a ni. TB vei damdawi pangngaia enkawl theih loh (Multiple Drugs Resistance) neite enna khawl pawh kan nei tawh a ni.

**11. RUH, THA LEH TIHRAWL NA ENKAWLN (PHYSIOTHERAPY UNIT) :**

Kan Damdawi Ina Physiotherapy Unit hi khawl changkang leh tha tak taka thuan a ni a, ni tin damdawi in chhung leh pawm lam atanga pantu an pung zel a ni. Ruh, Tha leh Tihrawl nate enkawlna hmun hi Physiotherapist thiam tak hovin ni tin an vil a. Hetiang lama harsatna neite tan kan damdawi in Physiotherapy Unit hi pan manhla tak a ni.

*Contd...*

**12. ZIR LEH TURA INBUATSAIHNA :**

Heng a hnuai Medical Officer te hi Hospital Board chuan zir leh turin a chhawp chho mek a ni :-

- |                            |                             |                  |
|----------------------------|-----------------------------|------------------|
| 1) Dr Zothuamluaia         | 3) Dr Vanlalkima            | 5) Dr Zomuanpuii |
| 2) Dr Lalrinmawii Khiangte | 4) Dr Samuel Lalhrualtuanga |                  |

**13. ZIR MEK LEH ZIR ZO :**

a) Dr Lalrinawmi Chhangte chuan CMC, Ludhiana-ah DA (Anaesthesiology) a zir zawh hnuin, 3rd January, 2014 khan a hna arawn zawm.

b) Miss R. Lalmuanpuii, Tutor chuan Christian Medical College, Vellore atangin M.Sc. (Nurs-ing, Community Health) tha taka a zir zawh hnuin 8th August, 2013 atangin a hna arawn zawm leh ta.

c) CMC, Vellore-ah kan Kohhran tirha MBBS zir mi 4 an awm mek. An zir zawh hunah kum 2 chhung kan damdawi ina thawk tur an ni a, chungte chu :-

- |                               |                              |
|-------------------------------|------------------------------|
| 1) Lalthanpari, Jubilee Veng  | 3) Deborah Z. Tlau, Guwahati |
| 2) Lalmalsawmi Ralte, Ramhlun | 4) Lalthazuali, Mission Veng |

**14. THAWKTU HNAZAWM THARTE :**

a) Dr Zomuanpuii, D/o Zodingliana, Chanmari, Aizawl chuan ni 11th April, 2013 atangin Medi-cal Officer hna arawn zawm.

b) Dr Ruth Lalmuanpuii, D/o Pu Vanlalruata (L), Kulikawn chuan 1st May, 2014 atangin Medi-cal Officer hna arawn zawm bawk.

**15. DAMDAWI IN PAWN LAM RAWNGBAWLNA HNATE :**

1) **Mobile Clinic** : April, 2013 atanga March, 2014 inkar chhungin Pastor Bial, Kohhran leh khaw hrang hrang 24-ah Mobile Clinic neih a ni a, damlo 4981 en an ni. Thawktu leh kal velna senso indaih loh avangin min sawmtu Bial leh Kohhran zawng zawng kan tlawh thei thin lova, paw kan ti hle.

2) **Blood Donation** : April, 2013 atanga March, 2014 chhungin Kohhran, KTP, YMA leh Tlawmngai pawl hrang hrangte hnen atangin thisen Unit 4290 kan dawng a, a mamawhte tana thisen petu zawng zawngte chungah lawmthu kan sawi a ni.

**3) Mit zai lam (Surgical Eye Camps) :**

a) **A hmuna zai chilh (Surgical Outreach Camps) :**

Khaw hrang hrang 3-ah neih a ni a, mit 153 zai a ni.

b) **Damdawi Ina zai (Base Hospital Eye Camps) :**

Vawi 8 neih a ni a, cataract 228 zai sak an ni.

**16. THILPEK DAWNTE :**

April 2013 - March 2014 chhunga Charity Fund leh Donation atana sum fai kan dawn chu hetiang hi a ni.

1) Charity Fund : Rs. 20,94,618/-

2) Hospital Sunday : Rs. 13,58,405/-

3) Donation : Rs. 11,27,780/-

**TOTAL : Rs. 45,80,803/-**

Mi thahnemngaithe thilpek atang hian damlo awmman pe thei lo leh pe tla thei lo mi tam tak pek sak an ni a. Chumi avang chuan awmman ba pawh a lo tlahniam ta hle a, Dt. 31st March, 2014-ah chuan awmman ba tlingkhawm hi Rs. 160,21,881/- a ni ta a ni. Mi harsa leh tanpui ngaite tana inpe mi thahnemngai an pung zel a. Nikum lam ai chuan damlo awmman ba pawh a lo tlem ta zawk a ni.

Heng Hospital Sunday leh Charity Fund atana sum tlingkhawm hi Kohhran, pawl leh mimal atanga dawn a ni a, damlo rethei awmman pe thei lo mi 381 te tan hman a ni.

4) Thilpek dang : Kohhran, mimal leh pawl hrang hrang atangin hetiang hian thilpek kan dawng.

Hmuphiah	: 1,074	Thuthlengsei	: 64	Water filter	: 2
Flower pot	: 155	Refrigerator	: 1	Kristian Hlabu	: 33
Matress	: 10	Table Fan	: 1	Balhla	: 3 bags
OT Gown	: 10	Dr. Apron	: 10	Cooker 25L	: 1
Caps	: 75	Nebulizer	: 1	Dekchi	: 6
Lukham	: 54	Glass no	: 1 dozen	Puan sin	: Bale 4
Mobile Phone	: 3	Bible	: 36	Decoration light	: 6
Electric Heater	: 2	Mitthi khuhna puan	: 45	Sahbawn	: 196
Buhfai	: 3 bags	Artui	: 3 boxes	Dal	: 10 Kgs.
Cake	: 13	Sana	: 2	Blanket	: 35
Silpaulin	: 2	IV Stand	: 8	Swabstick	: Thahnem tawk tak
Ol Drugs	: Rs. 49,720/-	man hu		Buhfai thap	: Tum hnih
Thuthlengsei Ngenchhan nei leh Cushion	: 5			hnatlang	

**9. PROJECT LEH HMUN DANGA RAWNGBAWLNA :**

Kan damdawi in hian Sorkar nena thawhhona chi hrang hrang kan nei mek a, hetiangin :

a) Marpara PHC : Marpara Damdawi In hi Sokar nena thawhhona [Public Private Partnership (PPP) Mode] a ni a, kan Damdawi In hian enkawl hna kan kalpui mek a. Doctor-te thla tin an in awm chhawk thin a ni.

b) Mobile Medical Unit (MMU) : Aizawl West District Area-a khaw 40 chuang chu kan damdawi in hian Sorkar aiawhin hriselna lamah a tul anga enkawl na a pe thin a ni. Khaw hrang hrang 25-ah Mobile Clinic neih a ni a, damlo 3074 en an ni.

c) Drop-in Centre : Ruihhlo ngaite tanpuina leh enkawl na hmun Sikulpuikawn-a kan neih thin chu Central YMA Building, Tuikhuahtlang-ah chhonzawm zel a ni.

**PATHIAN THU ZIR DUH TAN**

Presbyterian Bible School, Mission Veng-ah Session 32-na atan Certificate in Theology (C.Th) Admission hawn a ni a. Dil duhte tan a hnuai tarlan hi hriat tur a ni e.

- |                |  |
|----------------|--|
| Admission Form | : Office hun chhungin Rs. 10/- a lei theih a ni                          |
| Dil hun chhung | : August 20, 2014 (Thawhtanni) tlai dar 3:00 thleng                      |
| Dil thei chin  | : Class VII passed, kum 16 chin, Kohhran dan chhunga awm                 |
| Interview      | : August 28, 2014 (Ningani) chawhma dar 10:00                            |
| Class tan hun  | : September 2, 2014 (Thawhlethni)  |
| Zir hun chhung | : September - December, 2014   |
| Stipend        | : Zirlai pakhat hnenah thla fin Rs. 500/- pek a ni ang. Hostel a awm lo. |

Hrechiang duh tan Phone No. **8575308007/2317343/2350082**-ah zawh theih a ni.

**REV. R. LALENGMAWIA**  
Principal, PBS